

摘藻堂四庫全書薈要

集部

欽定四庫全書薈要卷一萬八千八百九十六

集部

御定佩文齋詠物詩選卷二百七十四

菱芡類

五言古

採菱曲

梁

簡文帝

菱花落復含  
桑女罷新蠶  
桂棹浮星艇  
徘徊蓮葉南

採菱曲

梁

陸罩

參差雜荇枝  
田田競荷密  
轉葉任香風  
舒花影流日  
戲

鳥波中蕩游魚菱下出不與文王嗜羞持比萍實

采菱詞

唐  
儲光羲

濁水菱葉肥清水菱葉鮮義不遊濁水志士多苦言潮  
沒具區藪潦深雲夢田朝隨北風去暮逐南風旋浦口  
多漁家相與邀我船飯稻以終日羹蓴將永年方冬水  
物窮又欲休山樊盡室相隨從所貴無憂患

七言古

采菱行

唐  
劉禹錫

白馬湖平秋日光紫鱗如錦綵  
鴛翔蕩舟游女滿中央  
采菱不顧馬上郎爭多逐勝紛相向  
時轉蘭橈破輕浪  
長鬟弱袂動參差釵影釧文浮蕩漾  
笑語哇咬顧晚暉  
蓼花綠岸扣舷歸歸來共到市橋步  
野蔓繫船萍滿衣  
家家竹樓臨廣陌下有連檣多估客  
攜觴薦芟夜經過  
醉踏大隄相應歌屈平祠下沅湘水  
月照寒波白煙起  
一曲南音此地聞長安北望三千里

食雞頭

宋  
歐陽修

六月京師暑雨多夜夜南風吹芡觜凝祥池鎖會靈園  
僕射荒陂安可擬爭先園客采新苞剖蚌得珠從海底  
都城百物貴鮮新厥價難酬與珠比金盤磊落何所薦  
滑臺潑醅如玉醴自慚竊食萬錢厨滿口飄浮嗟病齒  
却思年少在江湖野艇高歌菱荇裏香新味美手自摘  
玉潔沙磨軟還美一瓢固不羨五鼎萬事適情為可喜  
何時遂買潁東田歸去結茅臨綠水

食雞頭

宋

蘇轍

芡葉初生皺如縠南風吹開輪脫輻紫苞青刺攢蝟毛  
水面放花波底熟森然出手初莫近誰料明珠藏滿腹  
剖開膏液尚糝糊大盜磨聲風雨速清泉活火曾未久  
滿堂坐客分升掬紛然咀嚼惟恐後勢若羣雛方脫粟  
東都每憶會靈沼南國陂塘種尤足東遊塵土未應嫌  
此物秋來日常食

采芡

宋  
文同

芡盤團團開碧輪城東壕中如疊鱗漢南父老舊不識

日日岸上多少人  
駢頭鬚鬆露秋熟  
綠刺紅針割寒玉  
提籠當筵破紫苞  
老蚌一開珠一掬  
吹臺北下凝祥池  
圃田東邊僕射陂  
如今兩處盡湮沒  
異日此地名應馳  
物貴新成味尤美  
可惜飄零還入水  
料得明年轉更多  
一匣清波流珠子

採菱圖

明  
杜瓊

苕谿秋高水初落  
菱花已老菱生角  
紅裙綠髻誰家人  
小艇如梭不停泊  
三三兩兩共采菱  
纖纖十指寒如冰

不怕指寒并刺損，只恐歸家無斗升。  
湖州人家風俗美，男解耕田女絲枲。  
採菱即是採桑人，又與家中助生理。  
落日青山斂暮煙，湖波十里鏡中天。  
清歌一曲循歸路，不似耶谿唱採蓮。

五言律

菱

唐  
李嶠

鉅野韶光暮，東平春溜通。  
影搖江浦月，香引棹歌風。  
日色翻池上，潭花發鏡中。  
五湖多賞樂，千里望難窮。



七言律

食雞頭子

宋

楊萬里

江妃有訣煮真珠，菰飯牛酥軟不如。  
手擘雞頭金五色，盤傾驪頰琲千餘。  
夜光明月供朝嚼，水府靈宮恐夕虛。  
好取藍田餐玉法，編歸辟穀赤松書。

食雞頭子

楊萬里

三危瑞露凍成珠，九轉丹砂鍊久如。  
鼻觀溫芳炊桂歇，齒根熟軟剝胎餘。  
半甌鷹爪中秋近，一炷龍涎丈室虛。

却憶吾廬野塘味滿山柿葉正堪書

五言絕句

江行

唐

錢起

細竹漁家路斜陽看結罾喜來邀客坐分與折腰菱

菱

宋

梅堯臣

紫角菱實肥青銅菱葉老孤根未能定不及寒塘草

采菱舟

宋

朱子

湖平秋水碧桂棹木蘭舟一曲菱歌晚驚飛欲下鷗

過高郵射陽湖雜詠

元

薩都拉

霜落大湖淺漁家懸破罾此時生計別小艇賣秋菱

題谿樓

元

余闕

谿水綠悠悠高樓在谿上日暮望江南舟中採菱唱

六言絕句

望亭飯僧作

明

僧洪恩

隔岸長松疎柳雙谿一片湖光夜聽漁舟共語風吹菱  
芡時香

七言絕句

看采菱

唐

白居易

菱池如鏡淨無波  
白點花稀青角多  
時唱一聲新水調  
謾人道是采菱歌

菱荇沼

唐

薛濤

水荇斜牽綠藻浮  
柳絲和葉卧清流  
何時得向谿頭賞  
旋摘菱花旋泛舟

菱渚

宋

林逋

含機綠錦翻新葉滿篋青銅瑩古花最愛晚來鷗與鷺  
宿煙翹雨便為家

秋思

宋

陸游

老子齋居罷擊鮮木盤竹筍每隨緣鄰僧不用分香鉢  
蓮芡猶堪過半年

菱沼

宋

楊萬里

柄似蟾蜍股樣肥葉如蝴蝶翼相差蟾蜍翹立蝶飛起  
便是菱花著子時



御定佩文齋詠物詩選卷二百七十四



總校官庶吉士臣侍朝

校對官庶吉士臣嚴福

謄錄監生臣徐大豐



欽定四庫全書薈要

集部

御定詠物詩選卷二百七十五

六

詳校官原任主事<sup>臣</sup>李斯咏



欽定四庫全書薈要卷一萬八千八百九十七

集部

御定佩文齋詠物詩選卷二百七十五

總樹類

五言古

古詩

漢  
闕名

庭中有竒樹綠葉發華滋攀條折其榮將以遺所思馨  
香盈懷袖路遠莫致之此物何足貴但感別經時

雜詩

晉  
張翰



東鄰有一樹三紀裁可拱無花復無實亭亭雲中竦  
禽不為巢短翮莫肯任忽有一飛鳥五色雜英華一鳴  
衆鳥至再鳴衆鳥羅長鳴搖羽翼百鳥互相和

讀山海經

晉陶潛

丹木生何許迺在崆山陽黃花復朱實食之壽命長  
白玉凝素液瑾瑜發奇光豈伊君子寶見重我軒皇

其二

逍遙蕪臯上杳然望扶木洪柯百萬尋森散覆暘谷靈

人侍丹池朝朝為日浴神景一登天何幽不見燭

其三

粲粲三珠樹寄生赤水陰亭亭凌風桂八榦共成林靈  
鳳撫雲舞神鸞調玉音雖非世上寶爰得王母心

芳樹

梁元帝

芬芳君子樹交柯御宿園桂影含秋月桃花染春源落  
英逐風聚輕香帶藥翻叢枝臨北閣灌木隱南軒交讓  
良宜重成蹊何用言

芳樹

梁

丘遲

芳葉已漠漠嘉實復離離  
發景傍雲屋凝暉覆華池  
輕蜂掇浮穎弱鳥隱深枝  
一朝容色茂千春長不移

芳樹

陳

張正見

奇樹舒春苑流芳入綺錢  
合歡分四照同心影萬年  
香浮佳氣裏葉映彩雲前  
欲識揚雄賦金玉滿甘泉

芳樹

陳

顧野王

上林通建章雜樹遍林芳  
日影桃蹊色風吹梅徑香  
幽

山桂葉落馳道柳條長折榮疑路遠用表莫相忘

賦得芳樹

陳李爽

芳樹千株發搖蕩三陽時氣軟來風易枝繁度鳥遲春  
至花如錦夏近葉成帷欲寄邊城客路遠詎能持

詠樹

北周庾信

交柯乍百頃擢本或千尋楓子留為式桐孫待作琴殘  
核移桃種空花植棗林幽居對蒙密蹊徑轉深沈

移樹

庾信

酒泉移赤柰河陽徙石榴雖言有千樹何處似封侯

送劉散員同賦得陳思王詩山樹鬱蒼蒼

唐

許敬宗

喬木託危岫積翠繞連岡葉疎猶漏影花少未流芳  
風來聞肅肅霧罷見蒼蒼此中餞行邁不異上河梁

望宅中樹有所思

唐

盧照鄰

我家有庭樹秋葉正離離上舞雙棲鳥中秀合歡枝  
勞思復勞望相見不相知何當共攀折歌笑此堂垂

翫新庭樹因詠所懷

唐

白居易

霽霽四月初新樹葉成陰  
動搖風景麗蓋覆庭院深  
下有無事人竟日此幽尋  
豈惟翫時物亦可開煩襟  
時與道人語或聽詩客吟  
度春足芳色入夜多鳴禽  
偶得幽閒境遂忘塵俗心  
始知真隱者不必在山林

截樹

白居易

種樹當前軒樹高柯葉繁  
惜哉遠山色隱此蒙籠間  
一朝持斧斤手自截其端  
萬葉落頭上千峯在面前  
忽似



決雲霧豁達觀青天又如所念人久別一歎顏始有清  
風至稍見飛鳥還開懷東南望目遠心遼然人各有偏  
好物莫能兩全豈不愛柔條不如見青山

新晴後谿樹陰灑然覽景成韻

宋文同

雨後谿水急晴光鬱如浮高林放繁陰黯黯幢蓋稠麥  
熟桑椹好撩亂黃粟留伊伊動新蜩局局啼乳鳩晚策  
貪靜境緩帶成獨遊照影俯回淵濯足臨漫流願言懷

世慮逐此瀟灑休定知今夕夢不作塵土憂

京城閒居雜言

元 揭傒斯

朔土高且厚民生勁而彊榆柳雖弱質生植益繁昌桃李大於拳棗粟充餼糧誰謂苦寒地百物莫得傷青青雲夢竹宿昔傲雪霜移植於此庭不如芥與楊竹性豈有改由來非本鄉

題拙作小圖

元 朱德潤

碧山高陰岑老樹立突兀嵐光凝曉候隱見蒼林密空

谷有佳人胡寧欲行役

其二

招提抱層巖闌楯出虛迴  
微微宿靄收轉見蒼林靜  
客子更何之扶筇躡雲磴

題黃彥成雲林小隱

明 練子寧

有客素肥遯幽居愛林廬  
結屋依陋巷種樹繞城隅  
浮雲南山來清陰覆其間  
老柳帶寒色芳蘭露春腴  
窗深不知曉樹密室自虛  
甘貧意自適守道樂有餘  
娛賓非

旨酒飽食但園蔬流水赴大壑翔禽戀高株物性各有  
遂誰能常晏如

題葉熙時空樹軒

明僧智昞

嘗聞松化石未聞樹化竹君家草堂樹何乃虛其腹懷  
抱日益空枝葉不放綠其中有容焉外潤若不足僧還  
可入定旅寓何必屋居士空諸有不獨此老木

七言古

賦得庭中有奇樹

陳賀循

三春節物始芳菲遊絲細草動春暉香風飄舞花間度  
好鳥和鳴枝上飛臨池間竹偏增綠依堦映雪紛如玉  
溫室庭前竟不言鼓吹樓中能作曲曾聞遠別舊難思  
攀折會取贈佳期長條本自堪為帶密葉由來好作帷  
星稀漢轉月輪明徘徊夜鵲屢相驚欲識幽人蘭杜徑  
山窗芳桂復叢生

題遠山平林圖

宋

王

炎

山色微茫疑有無木葉半脫殊蕭疎雲根更著數椽屋

此屋當有幽人居墨妙逼真乃如此畢竟非真惟近似  
何如屐齒飽經行是處谿山皆畫筭還君圖畫吾且歸  
家在江南依翠微

西湖酒家壁畫枯木

元 宋 无

衡岳喬松道途遠成都古柏山川隔忽驚老樹刺眼來  
疑是頽崖壓東壁拗怒風雷龍虎氣盤摺造化乾坤力  
陰連滄海一片秋秀奪西湖兩峯色寒雲再惹靈畫影  
凍蘚緣沿借春碧醉翁睥睨欲挂衣禪伯經營思憇錫

烏鳶冥下踏枝空猿猱夜過嗔藤仄鐵榦銅柯嗅不香  
蒼雪玄煙潤將滴便擬攀蘿解糾纏何煩平地生荆棘  
直須掃去曲磔姿揮作昂霄數千尺

賦得獨樹邊淮送人之京

明林鴻

君不見秦淮水流東到海淮邊獨樹如車蓋九月微霜  
赤葉乾枯枝颯颯鳴天籟枝上啼鴉散曙煙枝頭殘照  
咽寒蟬離人留飲停車騎俠客相逢挂馬鞭南國高僧  
從此去駐錫雨花臺下路一飯淮邊洗鉢時六時宴坐

祇園樹野鶴孤雲任去還  
禪心不道別離難  
山中亦有長松樹  
待爾青青共歲寒

五言律

送竇校書見餞得雲中辨江樹

唐  
張九齡

江水天連色無涯  
淨野氛微明岸傍樹  
凌亂渚前雲舉  
棹形隨轉登艫意漸分  
渺茫從此去空復  
惜離羣

試古木卧平沙

唐  
王冷然



古木卧平沙摧殘歲月賒有根橫水石無幹拂煙霞春  
至苔為葉冬來雪作花不逢星漢使誰辨是靈槎

賦得海邊樹

唐  
皇甫冉

歷歷緣荒岸冥冥入遠天每同沙草發長共水雲聯搖  
落潮風早離披海雨偏故傷遊子意多在客舟前

枯樹

唐  
韓愈

老樹無枝葉風霜不復侵腹穿人可過皮剝蟻還尋寄  
託惟朝菌依投絕暮禽猶堪持改火未肯但空心

古樹

唐張籍

古樹枝柯少枯來復幾春  
露根堪繫馬空腹恐藏人  
蠹節莓苔老燒痕霹靂新  
若當江浦上行客祭為神

路傍樹

唐馬戴

古樹何人種清陰減昔時  
莓苔根半露風雨節偏危  
蠹心將穴蟬催葉向衰  
樵童不須剪聊起召公思

禁中庭樹

宋錢惟演

紫闥分陰地丹條擢秀時  
高枝接溫樹密葉覆辛夷  
夜

影瑤光接晨英玉露滋  
乘春好封植為賦角弓詩

翠雨亭詩

元  
朱德潤

翠樹元無雨空濛暗濕衣  
林深迷遠嶂風捲雜晴暉  
嵐潤侵書几陰涼拂釣磯  
蒼雲何處密清曉傍蒼飛

倚樹

明  
王野

偶爾依芳樹跣跡綠苔身  
忘羣鳥近坐久一花開移  
影高還下看人去復回  
攜書空置石翻動任風來

五言排律

永樂縣所居一草一木無非自我今春悉已芳

茂因書即事一章

唐

李商隱

手種悲陳事心期翫物華  
柳飛彭澤雪桃散武陵霞  
枳嫩棲鸞葉桐香待鳳花  
綬藤縈弱蔓袍草展新芽  
學植功雖倍成蹊跡尚賒  
芳年誰共翫終老邵平瓜

咸通十四年府試木向榮

唐

鄭谷

園林青氣動衆木散寒聲  
敗葉牆陰在滋條雪後榮  
欣欣春令早藹藹日華輕  
庾嶺梅先覺隋堤柳暗驚  
山川

應物候皋壤起農情祇待花開日連棲出谷鶯

七言律

紅樹

唐  
吳融

一聲南雁已先紅  
槭槭淒淒葉葉同  
自是孤根非暖地  
莫驚他木耐秋風  
曉煙散去陰全薄  
明月臨來影半空  
長憶洞庭千萬樹  
照山橫浦夕陽中

書綠帷亭壁

宋  
文同

喬木繞舍如綠帷  
羣山四面寒參差  
春禽入秋啼自別

早雲到暮歸常遲庭前好菊勸飲酒案上佳紙邀吟詩  
閒居數月興便野渾忘簿書相聒時

紅樹

文同

萬葉驚風盡捲收獨餘紅樹擬禁秋已疑斷燒生前嶺  
更共殘霞入遠樓楓岸最深霜未落柿園渾變雨初休  
勸君莫上青山道妝點行人分外愁

綠陰

元謝宗可

萬樹東風湧翠瀾遮藏芳恨料應難入簾蒼靄暮春晚

滿地碧雲清晝寒柳暗池臺煙乍濕槐深門巷雨初乾  
階前花落無人到又染苔痕上石闌

次韻和石末公紅樹詩

明  
劉基

岸柳江蒲總戚施  
柏林辛苦擢金支  
虞人詫見炎官傘  
候騎訛傳漢將旗  
照水熒煌空銜貌  
因風飄落竟從誰  
應慙若木生暘谷  
長駐跋烏燭崦嵫

次韻和石末公紅樹詩

劉基

紅樹漫山駐歲華  
玄冬驚見眼生花  
井陘旗幟軍容盛

汴水帆檣御氣賒  
春草淒迷金谷障  
夕陽照灼赤城霞  
靡萍丹木扶桑裏  
惆悵誰乘博望槎

薊門煙樹

明楊榮

薊門春雨散浮埃  
煙樹溟濛霽欲開  
十里清陰連紫陌  
半空翠影接金臺  
東風葉暗留鶯語  
落日林深看鳥回  
記得清明攜酒處  
碧桃花底坐徘徊

薊門煙樹

明金幼孜

野色蒼蒼接薊門  
淡煙疎樹碧氤氳  
過橋酒幔依稀見



附郭人家遠近分翠雨落花行處有綠陰啼鳥坐來聞  
玉京盡日多佳氣縹緲還看暎五雲

薊門煙樹

明  
李東陽

薊丘城外訪遺蹤樹色煙光遠更重飛雨過時青未了  
落花殘處綠還濃路迷南郭將三里望斷西林有數峯  
坐久不知遲日霽隔谿僧寺午時鐘

樹色

明  
邵寶

乍濃還淡弄朝暉樹色依稀定是非樓上望回川歷歷

城陰遮斷路微微  
晴雲有影團傾蓋  
春水無波綠染衣  
獨坐懷人心正遠  
天空渭北雁初歸

樹影

明

朱之蕃

層枝疊葉點苔斑  
深院重垣總莫闌  
夾道密移須按轡  
滿庭交匝可怡顏  
月穿池岸連浮藻  
日射園林障遠山  
斜拂北窗來枕簟  
清陰合處鳥聲閒

七言排律

畫古木

元

馬祖常

桑空河上生賢相  
楓老山中化羽人  
未借九關當地軸  
還曾八月上天津  
雷燒桐尾琴材古  
玉刻龍形劍具新  
雨蝕蒼皮苔護石  
泉舂玉乳月翻輪  
東堤楊柳春煙暖  
西浦芙蓉曉露勻  
偃蹇孤根巖壑氣  
我知棫樸不為薪

五言絕句

洛陽道獻呂四郎中

唐儲光義

洛水春冰開洛城  
春樹綠朝看大道上  
落花亂馬足

北垞

唐王維

北垞湖水北雜樹暎朱欄  
逶迤南川水明滅青林端

漆園

王維

古人非傲吏自闕經世務  
偶寄一微官婆婆數株樹

同賦送遠客一絕

唐皇甫冉

行隨新樹深夢隔重江遠  
迢遞風日間蒼茫洲渚晚

天長地久詞

唐盧綸

玉砌紅花樹香風不敢吹  
春光解天意偏發殿南枝

晚思

唐司空曙

蛩吟窗下月草濕階前露晚景淒我衣秋風入庭樹

早發汾南

唐王 建

橋上車馬發橋南煙樹開青山斜不斷迢遞故鄉來

夢江南

唐張 祜

行吟洞庭句不見洞庭人盡日碧江夢江南紅樹春

古樹

唐崔道融

古樹春風入陽和力太遲莫言生意盡更引萬年枝

行園樹

宋徐 鉉

松節凌霜久蓬根逐吹頻羣生各有性桃李但爭春

和晏相公湖上

宋 韓 維

風枝挂危露飛動夕陽中莫遣兒童撼留看著葉紅

余元祐六年六月罷著作佐郎除秘書丞是歲

仲冬復除著作郎兼史院檢討復至舊局題

屏

宋 張 耒

庭樹應知我相逢益老蒼別來秋苦雨但見瓦松長

觀祝孝友畫卷

宋 朱 子

天邊雲遶山江上煙迷樹不向曉來看詎知重疊數

山居雜詩

金元好問

漲落沙痕出堤摧岸口斜斷橋堆聚沫高樹閣浮槎

即事

元趙雍

獨坐對明月遙遙千古情西風兩三日庭樹已秋聲

題宋子障太守畫

元張昱

老樹含青雨平林澹白煙隔谿茅屋在好泊米家船

六言絕句

舍北閒望作六字絕句

宋陸游

潘岳一篇秋興李成八幅寒林舍北偶然倚杖盡見古  
人用心

題畫

元倪瓚

罨畫谿頭喚渡銅官山下尋僧水榭汀橋曲曲風林雲  
磴層層

絕句

元張雨

二山環合一水中有老木叅天不著幽人草閣誰收無



限雲煙

七言絕句

送朱越

唐

王昌齡

遠別舟中蔣山暮君行舉首燕城路  
薊門秋月隱黃雲  
期向金陵醉江樹

詣徐卿覓果栽

唐

杜甫

草堂少花今欲栽不問綠李與黃梅  
石筍街中却歸去  
果園坊裏為求來

送齊山人歸長白山

唐韓翃

舊事仙人白兔公  
掉頭歸去又乘風  
柴門流水依然在  
一路寒山萬木中

送韋判官

唐盧綸

前峯後嶺碧濛濛  
草擁驚泉樹帶風  
人語馬嘶聽不得  
更堪長路在雲中

雨晴至江渡

唐柳宗元

江雨初晴思遠步  
日西獨向愚谿渡  
渡頭水落邛徑成

撩亂浮槎在高樹

同錢員外禁中夜直

唐白居易

宮漏三聲知半夜好風涼月滿松筠此時間坐寂無語  
藥樹影中惟兩人

戲題山居

唐陳羽

雖有柴門長不關片雲高木共身閒猶嫌住久人知處  
見欲移居更上山

宮詞

唐王涯

曛曛日出大明宮  
天樂遙聞在碧空  
禁樹無風正和暖  
玉樓金殿曉光中

其二

御果收時屬內官  
傍簷低壓玉闌干  
明朝摘向金華殿  
盡日枝頭次第看

古樹

唐徐凝

古樹欹斜臨古道  
枝不生花復生草  
行人不見樹少時  
樹見行人幾番老

寄永道士

唐  
李商隱

共上雲山獨下遲  
陽臺白道細如絲  
君今併倚三珠樹  
不記人間葉落時

池邊

李商隱

玉瑄葭灰細細吹  
流鶯上下燕參差  
日西千繞池邊樹  
憶把枯條撼雪時

漢陰庭樹

唐  
趙嘏

掘溝引水澆蔬圃  
插竹為籬護藥苗  
楊柳如絲風易亂

梅花似雪日難消

曉宴

唐  
李羣玉

金波西傾銀漢落  
綠樹含煙倚朱閣  
曉華曛曛聞調笙  
一點殘燈隔羅幕

小遊仙

唐  
曹唐

玄洲草木不知黃  
甲子初開浩劫長  
無限萬年年少女  
手攀紅樹滿殘陽

荆林館

宋  
孔平仲

古木森然滿驛庭繁陰凌亂月分明千枝萬葉誰拘管  
攪作秋風一片聲

出郊

宋 王安石

川原一片綠交加深樹冥冥不見花風日有情無處著  
初迴光景到桑麻

入瑞巖道間絕句呈彥集充父二兄

宋 朱子

風高木落晚秋時日暮千林黃葉稀祇有蒼蒼谷中樹

歲寒心事不相違

丙辰正月三日贈彭世昌歸山 朱子

象山聞說是君開雲木參天瀑響雷好去山頭且堅坐  
等閒莫要下山來

玉山道中

宋 楊萬里

邨北邨南水響齊巷頭巷尾樹陰低青山自負無塵色  
盡日殷勤照碧谿

道傍草木

楊萬里



古樹何年澗底生只今已與嶺般平  
千稍萬葉無重數  
一一分明報雨聲

連江官湖

宋 徐璣

衆山圍繞綠團圓  
官木參差古道邊  
行盡濃陰全不了  
一湖飛雨帶輕煙

秋興

金 吳激

後園雜樹入雲高  
萬里長風夜怒號  
憶向錢塘江上寺  
松窗竹閣瞰秋濤

雜詩

金王礪

陰陰綠樹閭庭除散盡鳴禽靜有餘  
獨對熏爐坐終日會心惟有漆園書

其二

屋頭叢木撼蒼煙風捲飛花到枕邊  
南寺有僧來問字打門驚覺午窗眠

宋樓道中

金劉從益

十里羊腸路詰盤過花穿柳幾迴還  
馬頭忽轉青林角

綠繞人家水一灣

太乙宮

元王暉

庭樹瀟瀟綠滿廊日長深鎖碧窗涼  
隔簾遙見秋來處  
一葉輕黃墮井牀

題畫

元張憲

晴川渺渺停春水怪石叢叢插亂山  
最愛夕陽煙寺裏  
千株古木一僧閒

御定佩文齋詠物詩選卷二百七十五

欽定四庫全書薈要卷一萬八千八百九十八集部

御定佩文齋詠物詩選卷二百七十六

總花類

五言古

落花

梁  
蕭子範

綠葉生半長繁英早自香  
因風亂蝴蝶未落隱鸝黃  
飛來入斗帳吹去上牙牀  
非是迎冬質寧可值秋霜

賦得岸花臨水發

陳  
張正見

奇樹滿春洲落葉映江浮影間蓮花石光涵濯錦流漾  
色隨桃水飄香入桂舟別有仙潭菊含芳獨向秋

和王褒詠摘花

北周  
明帝

玉梳承花落花落腕中芳酒浮花不沒花含酒更香

詠園花

北周  
庾信

暫住春園傍聊過看果行枝繁類金谷花雜映河陽自  
紅無假染真白不須妝燕送歸菱井蜂銜上蜜房非是  
金爐氣何闕柏殿香裛衣偏定好應持奉魏王

于闐採花

隋  
樂府

山川雖異所草木尚同春亦如溱洧地自有採花人

浮遊花

隋  
辛德源

窗中斜日照池上落花浮若畏春風晚當思秉燭遊

灋上與幼遐月夜登西岡翫花

唐  
韋應物

置酒臨高隅佳人自城闕已翫滿川花還看滿川月  
花  
月方浩然賞心何由歇

對雜花

韋應物

朝紅爭景新夕素含露翻妍姿如有意流芳復滿園  
單棲守遠郡永日掩重門不與花為偶終遣與誰言

賦得春晚餘花落

唐李益

留春春竟去春去花如此蝶舞繞應稀鳥驚飛詎已衰  
紅亂故萼繁綠扶凋藥自委不勝愁庭風那更起

東坡種花

唐白居易

持錢買花樹城東坡上栽但購有花者不限桃杏梅百

果叅雜種千枝次第開  
天時有早晚地力無高低  
紅者霞豔豔白者雪皚皚  
遊蜂逐不去好鳥亦棲來  
前有長流水下有小平臺  
時拂臺上石一舉風前杯  
花枝蔭我頭花藥落我懷  
獨酌復獨詠不覺月平西  
巴俗不愛花竟春無人來  
惟此醉太守盡日不能迴

買花

白居易

帝城春欲暮喧喧車馬度  
共道牡丹時相隨買花去  
貴賤無常價酬直看花數  
灼灼百朵紅萋萋五束素  
上張



幄幕庇旁織芭籬護水灑復泥封移來色如故家家習  
為俗人人迷不悟有一田舍翁偶來買花處低頭獨長  
歎此歎無人喻一叢深色花十戶中人賦

觀花有感

元 虞 集

挂巾花樹枝酌酒花樹下風吹巾上塵花落手中竿清  
唱起相壽母遽且聊暇流光急去人莫怪行樂者

詠井底花移贈李太常

明 郭 第

素縷夜不垂寒波曉含潔嬌英被銀牀葳蕤弄澄澈對

月還對鏡堪賞那堪折細讀太常詩冷然瑩冰雪

七言古

風雨看舟前落花戲為新句

唐  
杜甫

江上人家桃樹枝春寒細雨出疎籬影遭碧水潛勾引  
風妬紅花却倒吹吹花困懶傍舟楫水光風力俱相怯  
赤憎輕薄遮人懷珍重分明不來接濕久飛遲半欲高  
縈沙惹草細於毛蜜蜂蝴蝶生情性偷眼蜻蜓避百勞

買花謠

唐  
劉言史

杜陵邨人不田穡入谷經谿復緣壁每至南山草木春  
即向侯家取金碧幽豔凝花春景曙採來攜得將何處  
蝶惜芳叢送下山尋斷孤香始回去豪少居連鳩鵲東  
千金使買一枝紅院多花少栽未得零落綠蛾纖指中  
咸陽親戚長安里無限將金買花子澆紅濕綠千萬家  
青絲玉轡聲啞啞

落花

宋

孔平仲

嶺南冬深花照灼比至春初花已落乘閒攜酒到西園

鳥散蜂歸春寂寞江南此際春如何紅杏海棠開正多  
歸期不及春風日猶見池塘著綠荷

惜花

宋文同

遊蜂採花花氣薄黃鳥啄花花藥落林風吹花花片亂  
池水浸花花色惡少年惜花花會意晴張青幃雨油幕  
勸君直須為花飲明日春歸空晚萼

飛花行贈馬衢州時馬在建舉別業

元戴表元

山上風花山下飛花飛欲盡  
山翁歸歸來亦自忘行跡  
但覺滿地紅依依餘花更惜隨  
春去谿上遊人山下路  
戀家漁父斷來蹤難老劉郎記前度  
花開花落春風前  
我昔與翁同少年祇今鶴去但華表  
何處鳥啼悲杜鵑  
遊人自遊春自暮從翁問花花不語  
且當向花日日醉  
醉倒花前學花舞

惜花歎

明高啟

惜花不是愛花嬌  
賴得花開伴寂寥  
樹樹長懸鈴索護

叢叢頻引鹿盧澆幾回欲折花枝嗅心恐花傷復停手  
每來花下每題詩不到花前不持酒准擬看花直盡春  
春今未盡已愁人纔留片萼依前砌全落千英過別隣  
懊惱園中妬花女畫幡不禁狂風雨流水殘香一夜空  
黃鸝魂斷無言語縱有星星在蘇衣拾來已覺損光輝  
只應獨背東窗卧夢裏相隨高下飛

賣花詞

高啟

綠盆小樹枝枝好花比人家別開早陌頭擔得春風行

美人出簾聞叫聲移去莫愁花不活賣與還傳種花訣  
餘香滿路日暮歸猶有蜂蝶相隨飛買花朱門幾回改  
不如擔上花長在

雨中看花

明  
楊基

青青楊柳深深竹雨裏絳桃開一簇羞將瘦蹇逐金鞍  
著屐看花仍不俗花枝淨洗胭脂面老眼驚如夢中見  
已擽春色過三分何止東風吹一片只恐天晴是暮春  
半隨流水半成塵淡煙芳草長干路作意能來有幾人

邀方員外看花

楊基

金昌亭西萬株花  
臘脂玉雪爭紛拏  
春風攜酒看花去  
騎馬徑到山人家  
花深樹密無徑入  
下馬徘徊暎花立  
紫萼風微翠袖香  
紅絲露重烏巾濕  
別來幾負看花期  
客裏怱怱見一枝  
白下橋邊寒食後  
廣陵城外綠陰時  
今年花最逢春早  
準擬清樽對花倒  
人意方邀酒伴來  
花枝已向東風老  
花雖漸老仍堪折  
猶勝紛紛滿蹊雪  
且共芙蓉幕裏人  
坐看海棠枝上月



賣花篇

明  
黃德水

日南氣候天下奇，四序皆如三月時。郊風謾賦為裘什，越俗空傳采葛詩。泉甘土沃山川美，長日花開爛於綺。不論秋去有蘭蓀，寧獨春來盛桃李。初景曛曛萬戶開，楚童絡繹賣花來。一筐新藥朝纔摘，數種奇葩歲自栽。曲房小閣開妝篋，紫貝青蚨走輕屨。若箇簾前飛墮英，誰家門外無殘葉。參珠間玉鬪光輝，踏青拾翠弄芳菲。花房剩有瑤臺露，滴盡儂家金縷衣。

五言律

和楊舍人詠中書省花樹

唐張文琮

華萼暎芳叢參差間早紅因風時落砌雜雨乍浮空影  
照鳳池水香飄雞樹風豈不愛攀折希君懷袖中

花底

唐杜甫

紫萼扶千蕊黃鬚照萬花忽疑行暮雨何事入朝霞恐  
是潘安縣堪留衛玠車深知好顏色莫作委泥沙

南池落花

唐羊士諤

蟬噪城溝水芙蓉忽已繁  
紅花迷越豔芳意過湘沅  
湛露宜清暑披香正滿軒  
朝朝祇自賞穠李亦何言

惜落花

唐白居易

夜來風雨急無復舊花林  
枝上三分落園中二寸深  
日斜啼鳥思春盡老人心  
莫怪添杯飲情多酒不禁

賦得雨後花

唐元稹

紅芳憐靜色深與雨相宜  
餘滴下纖葉殘珠墜細枝  
澆花江上思啼粉鏡中窺  
念此低徊久風光幸一吹

贈子直花下

唐  
李商隱

池光忽隱牆花氣亂侵房  
屏緣蝶留粉窗油蜂印黃  
官書推小吏侍史從清郎  
並馬更吟去尋思有底忙

晚春花

唐  
項斯

陰洞日光薄花開不及時  
當春無半樹經晚足空枝  
疎與香風會細將泉影移  
此中人到少開盡幾人知

題友人山花

唐  
方干

平明方盡拆為得好風吹  
不見移來日先愁落去時  
濃

香熏疊葉繁  
朵壓單枝來  
看皆終夕  
遊蜂似有期

落花

唐  
李咸用

拾得移時看重思  
造化功如何  
飄麗景不似遇  
春風滿地餘  
香在繁枝  
一夜空  
祇應公子見  
先憶墜樓紅

賦得花影

明  
王 偁

欲拂更紛紛  
空香寂不聞  
亂迷芳蝶夢  
輕護錦苔紋  
襯月籠書幌  
因風颺舞裙  
莫移庭下步  
蹴碎一階雲

花殘

明  
蔣山卿

寂寂門空閉  
菲菲花欲殘  
賞心不相見  
對酒若為歡  
小徑芳煙靄  
疎簾細雨寒  
一年春又謝  
惆悵思無端

延季居士種花詩

明王醇

誰能了空意  
因示數枝春  
色但隨根現  
花聊過眼新  
護香栽刺徧  
界綠委泉勻  
豈必來遊者  
方為借翫人

五言排律

夏日裴尹員外西齋看花

唐楊巨源

笑向東來客  
看花枉在前  
始知清夏月  
更勝豔陽天  
露

濕呈妝汗風吹畏火燃  
蔥龍和葉盛爛漫壓枝鮮  
紅彩當鈴閣清香到玉筵  
蝶棲鶯曙色鶯語滯晴煙  
得地殊堪賞過時倍覺妍  
芳菲遲最好惟是謝家憐

花邨六韻

唐吳融

地勝非離郭花深故號邨  
已憐梁雪重仍愧楚雲繁  
山近當吟冷泉高入夢  
喧依稀小有洞邂逅武  
陵源月好頻依座風輕  
莫閉門流鶯更多思百  
轉待黃昏

賦落花以宋元憲金谷樓危到地香得香字

明  
劉丞直

英華本天性開謝任年光自是春風改那因夜雨傷低  
徊飄綺席荏苒度雕牆翠霧當窗合紅雲匝地香點泥  
登燕壘添蜜入蜂房剪綵誇西苑成妝詫壽陽角哀翻  
塞曲徑遠誤漁郎但使靈根在重看錦樹芳

六言律

落花

唐  
李中

殘紅引動詩魔懷古牽情奈何半落銅臺月曉亂飄金



谷風多悠悠旋逐流水片片輕粘短莎誰見長門深鎖  
黃昏細雨相和

七言律

山花

唐錢起

山花照塢復燒谿樹樹枝盡可迷野客未來枝畔立  
流鶯已向樹邊啼從容只是愁風起眷戀常須向日西  
別有妖妍勝桃李攀來折去亦成蹊

西省對花憶忠州東坡新花樹因寄題東樓

唐  
白居易

每看闕下丹青樹，不忘天邊錦繡林。  
西掖垣中今日眼，南賓樓上去年心。  
花含春意無分別，物感人情有淺深。  
最憶東坡紅爛熳，野桃山杏水林檎。

闔閭城北有賣花翁，討春之士往往造焉。因招  
襲美

唐  
陸龜蒙

故城邊有賣花翁，水曲舟輕去盡通。  
十畝芳菲為舊業，一家煙雨是元功。  
閒添藥品年年別，笑指生涯樹樹紅。

若要見春歸處所不過攜手問東風

魯望以花翁之什見招因次韻酬之

唐  
皮日休

九十攜鋤偃僂翁小園幽事盡能通  
斲煙栽藥為身計負水澆花是世功  
婚嫁定期杉葉紫蓋藏應待桂枝紅  
不知家道能多少只在勾芒一夜風

對花

唐  
秦韜玉

長與韶光暗有期可憐蜂蝶却先知  
誰家促席臨低樹

何處橫釵戴小枝麗日多情疑曲照和風得路合偏吹  
向人難道渾無語笑勸王孫到醉時

惜花

唐  
李建勳

淡淡西園日又垂一樽何忍負芳枝莫言風雨長相促  
直是清明得幾時心破只愁鶯踐落眼穿唯怕客來遲  
年年使我成狂叟腸斷紅箋幾首詩

玉堂栽花周正孺有詩次其韻

宋  
蘇軾

故山桃李半荒榛粗報君恩便乞身竹簟暑風招我老  
玉堂花藥為誰春纖纖翠蔓詩催發皎皎霜葩鬢鬪新  
只有來禽青李帖他年留與學書人

看花

宋 曾 鞏

春來日日探花開紫陌看花始此回欲賦妍華無健筆  
擬酬芳景怕深杯但知抖擻紅塵去莫問鬢鬢白髮推  
更老風情轉應少且邀佳客試徘徊

落花

元 郝 經

彩雲紅雨暗長門翡翠枝餘萼綠痕桃李東風蝴蝶夢  
關山明月杜鵑魂玉闌煙冷空千樹金谷香銷謾一尊  
狼藉滿庭君莫掃且留春色到黃昏

花信

元黃潛

已覺尋芳去較遲千林紅紫總紛披幾經夜雨能無恙  
試問春風竟不知斜日遊蜂應有夢野亭立馬已多時  
殷勤却是江南客曾擘冰霜寄一枝

賣花聲

元謝宗可

春光叫徧費千金紫韻紅腔細細吟幾處又驚遊冶夢  
誰家不動惜芳心暗穿紅霧樓臺曉清逐香風巷陌深  
妝鏡美人聽未了繡簾低揭畫簷陰

春半採花

元 洪希文

芳菲著雨便成苔問訊東君幾日回閨月不曾花下去  
今朝偶到樹邊來幾何間闊鶯偏老如此生疎蝶也猜  
流水時光容易過舉頭枝上已青梅

落花詩

明 沈 周

飄飄蕩蕩復悠悠樹底追尋到樹頭趙武泥塗知辱雨  
秦宮脂粉惜隨流癡情戀酒粘紅袖急意穿簾泊玉鉤  
欲拾殘芳擣為藥傷春難療箇中愁

其二

夕陽無賴小橋西春事闌珊意亦迷錦里門前谿好浣  
黃陵廟裏鳥還啼焚追螺甲教香史煎帶牛酥囑膳嫖  
萬寶千鈿真可惜歸來直欲滿筐攜

花冤

明  
朱之蕃



交枝低亞藥紛披舞影飄香化日遲紅頰曉酣微困酒  
粉痕宵褪苦搜詩追從蜂蝶應難定倦聽笙歌有所思  
尋徧天涯芳草路三生石上月明時

落花

朱之蕃

春宵花月照春江瀉影流香繞客艘廣野芳冤招不得  
一天愁緒總難降啄餘燕嘴歸高棟粘向蜂鬚入小窗  
燈下簾垂寂無語似隨紅燼墜玉銀釭

其二

催花遣使憶新銜  
又報春歸燕語喃  
園月和煙霏曲徑  
江風帶雨灑孤帆  
亂飄不羨吳姬舞  
遠寄無勞驛使緘  
藉坐錦茵新釀熟  
待嘗櫻筍試羅衫

種花

明  
李流芳

為園數畝未言賒  
鑿沼疏泉手灌花  
花欲疎疎仍密密  
枝須整整復斜斜  
漸看節序皆芳候  
不放風光到別家  
最愛南榮冬日暖  
蠟梅一樹映山茶

五言絕句

贈李十四

唐王勃

小徑偏宜草空庭不厭花平生詩與酒自得會仙家

其二

亂竹開三徑飛花滿四鄰從來揚子宅別有尚玄人

林塘懷友

王勃

芳屏畫春草仙杼織朝霞何如山水路對面即飛花

題鑒上人房

唐宋之問

落花雙樹積芳草一庭春翫之堪興盡何必見幽人

喜入長安

唐  
崔湜

雲物能催曉風光不惜年  
賴逢征路盡歸在落花前

玉真公主山居

唐  
儲光羲

山北天泉苑山西鳳女家  
不言沁園好獨隱武陵花

江南曲

儲光羲

日暮長江裏相邀歸渡頭  
落花如有意來去逐船流

河上逢落花

唐  
萬楚

河水浮落花花流東不息  
應見浣紗人為道長相憶

送子壻往揚州

唐 劉長卿

半邏鶯滿樹新年人獨還  
落花逐流水共到茱萸灣

代人乞花

唐 李益

繡戶朝眠起開簾滿地花  
春風解人意吹落妾西家

花鳥

唐 韓愈

蜂蝶去紛紛香風隔岸聞  
欲知花鳥處水上覓紅雲

花源

韓愈

源上花初發公應日日來  
丁寧紅與紫慎勿一時開

惜花

唐張籍

山中春已晚處處見花稀  
明日來應盡林間宿不歸

酬范侍御

唐鮑溶

玉管傾杯樂春園鬪草情  
野花無限意處處逐人行

其二

相勸醉年華莫醒春日斜  
春風宛陵道萬里晉陽花

惜花

唐施肩吾

落盡萬株紅無人解繫風  
今朝芳徑裏惆悵錦機空

高花

唐  
李商隱

花將人共笑，籬外露繁枝。  
宋玉臨江宅，牆低不礙窺。

雜題

唐  
司空圖

孤枕聞鶯起，幽懷獨悄然。  
地融春力潤，花泛曉光鮮。

賞殘花

唐  
綰干著

零落多依草，芳香散著人。  
低簷一枝在，猶占滿堂春。

月夜汎舟

唐  
僧法振

西塞長雲盡，南湖片月斜。  
汎舟人不見，卧入武陵花。

雙池

宋蘇軾

沂流入城郭，疊疊渡千家。不見雙池水，長漂十里花。

花塢

宋文同

繚繞穿紅萼，斑踏紫苔。誰將錦步障，端為使君開。

花

明張羽

能白更兼黃，無人亦自芳。寸心原不大，容得許多香。

落花

明薛蕙

今朝捲簾坐時見，一花飛不惜。芳菲盡春風，稍稍稀。



六言絕句

山居樂

明

李言恭

一徑杳無車馬萬山忽有人家相問不知歲月惟見開  
花落花

七言絕句

惜花

唐

郭震

豔拂衣襟蘂拂杯  
遶枝閒共蝶徘徊  
春風滿目還惆悵  
半欲離披半未開

宴春源

唐  
王昌齡

源向春城花幾重  
江明深翠引諸峯  
與君醉失松谿路  
山館寥寥傳暝鐘

西巡歌

唐  
李白

水綠天青不起塵  
風光和暖勝三秦  
萬國煙花隨玉輦  
西來添作錦江春

江畔獨步尋花

唐  
杜甫

江深竹靜兩三家  
多事紅花映白花  
報答春光知有處

應須美酒送生涯

送王卿

唐韋應物

別酌春林啼鳥稀  
雙旌背日晚風吹  
却憶回來花已盡  
東郊立馬望城池

贈張千牛

唐韓翃

蓬萊闕下是天家  
上苑新回白鼻騮  
急管畫催平樂酒  
春衣夜宿杜陵花

河中府崇福寺看花

唐盧綸

聞道山花如火紅  
平明登市已經風  
老僧無見亦無說  
應與看人心不同

殘花

唐揚凝

五馬踟躕在路岐  
南來只為看花枝  
鶯銜蝶弄紅芳盡  
此日深閨那得知

和陳閣老當直從東省  
過史館看花

唐權德輿

晝漏沈沈倦瑣闌  
西垣東觀閱芳菲  
繁花滿地似留客

應為主人休澣歸

同幕府夜宴惜花

唐  
武元衡

五侯門館百花繁  
紅燭搖風白雪翻  
不似鳳凰池畔見  
飄揚今隔上林園

看花

唐  
羊士諤

一到花間一忘歸  
玉杯瑤瑟減光輝  
歌筵更覆青油幕  
急似朝雲瑞雪飛

送廖叅謀東遊

唐  
劉禹錫

九陌逢君又別離  
行雲別鶴本無期  
望嵩樓上忽相見  
看過花開花落時

詔追赴都

唐  
柳宗元

十一年前南渡客  
四千里外北歸人  
詔書許遂陽和至  
驛路開花處處新

落花

唐  
韓愈

已分將身著地飛  
那羞踐踏損光輝  
無端又被春風誤  
吹落西家不得歸

風折花枝

韓愈

浮豔侵天難就看清香撲地只遙聞春風也是多情思  
故揀繁枝折贈君

遊太平公主山莊

韓愈

公主當年欲占春故將臺榭壓城闈欲知前面花多少  
直到南山不屬人

登科後

唐孟郊

昔日齷齪不足誇今朝放蕩思無涯春風得意馬蹄疾

一日看遍長安花

九華觀看花

唐張籍

街西無數閒遊處不似九華仙觀中  
花裏可憐池上景  
幾重牆壁貯春風

山中主人

唐楊巨源

十里青山有一家翠屏深處更添霞  
若為說得谿中事  
錦石和煙四面花

春晚遊鶴林寺

唐李涉



野寺尋花春已遲  
背巖唯有兩三枝  
明朝攜酒猶堪賞  
為報春風且莫吹

衡州夜後把火看花留客絕句

唐

呂溫

紅芳暗落碧池頭  
把火遙看且少留  
半夜忽然風更起  
明朝不復上南樓

伏翼西洞送人

唐

陳羽

洞裏春晴花正開  
看花出洞幾時回  
殷勤好去武陵客

莫引世人相逐來

宮中詞

唐  
王建

五更三點索金車  
盡放宮人出看花  
仗下一鞭催立馬  
殿頭先報內園家

于主簿廳看花

王  
建

小葉稠枝粉壓堆  
暖風吹動鶴翎開  
若無別事為留滯  
應便拋家宿看來

看花屋

唐  
白居易

忽驚暎樹新開屋却似當簷故種花可惜年年紅似火  
今春始得屬元家

惜落花贈崔二十四

白居易

漠漠紛紛不奈何狂風急雨兩相和晚來悵望君知否  
枝上稀疏地上多

別種東坡花樹

白居易

花林好住莫顛顛春至但知依舊春樓上明年新太守  
不妨還是愛花人

僧院花

白居易

欲悟色空為佛事，故栽芳樹在僧家。  
細看便是華嚴偈，方便風開智慧花。

花栽

唐元稹

買得山花一兩栽，離鄉別土易摧頽。  
欲知北客居南意，看取南花北地來。

宮詞

唐王涯

春風擺蕩禁花枝，寒食鞦韆滿地時。  
又落深宮石渠裏，

盡隨流水入龍池

題郵亭殘花

唐張祜

雲暗山橫日欲斜  
郵亭下馬對殘花  
自從身逐征西府  
每到花時不在家

同友人看花

唐朱慶餘

尋花不問春深淺  
縱是殘紅也入詩  
每箇樹邊行一市  
誰家園裏最多時

春日餐霞閣

唐施肩吾

灑水初晴物候新  
餐霞閣上最宜春  
山花四面風吹入  
為我鋪牀作錦茵

觀葉生畫花

施肩吾

心竅玲瓏貌亦奇  
榮枯只在手中移  
今朝故向霜天裏  
點破繁花四五枝

念昔遊

唐杜牧

李白題詩水西寺  
古木回巖樓閣風  
半醒半醉遊三日  
紅白花開山雨中

春晚題韋家亭子

杜牧

擁鼻侵襟花草香  
高臺春去恨茫茫  
鶯紅半落平池晚  
曲渚飄成錦一張

和嚴惲秀才落花

杜牧

共惜流年留不得  
且環流水醉流杯  
無情紅豔年年盛  
不恨凋零却恨開

過南隣花園

唐  
雍陶

莫怪頻過有酒家  
多情長是惜年華  
春風堪賞還堪恨

纔見開花又落花

過舊宅看花

雍陶

山桃野杏兩三栽  
樹樹繁花去復開  
今日主人相引看  
誰知曾是客移來

惜花

唐方干

可憐妍豔正當時  
剛被狂風一夜吹  
今日流鶯來舊處  
百般言語殫空枝

詠花

方干



狂心醉眼共徘徊一半先開笑未開此日不能偷折去  
胡蜂直恐趁人來

賣花謠

唐來鵬

紫豔紅苞價不同市街羅列起香風無言無語呈顏色  
知落誰家池館中

山路見花

唐崔櫓

曉紅初拆露香新獨立空山冷笑人春意自知無主惜  
恣風吹逐馬蹄塵

文昌寓直

唐鄭谷

何遜空階夜雨平  
朝來交直雨新晴  
落花亂下花磚上  
不忍和苔踏紫英

賣花翁

唐吳融

和煙和露一叢花  
擔入宮城許史家  
惆悵東風無處說  
不教閒地著春華

日高

唐韓偓

朦朧猶認管絃聲  
噤疾餘寒酒半醒  
春暮日高簾半捲

落花和雨滿中庭

惜花

唐  
成彥雄

忘餐為戀滿枝紅  
錦帳頻移護曉風  
客散酒醒歸未得  
攔干獨立月明中

紅花

唐  
李中

紅花顏色掩千花  
任是猩猩血未加  
染出輕羅莫相貴  
古人崇儉戒奢華

晚春寄示茂才馮彭年

宋  
林逋

頭上酒巾為長物據梧微詠意無涯人生行樂知能幾  
但見春風滿路花

山邨

宋  
蘇軾

竹籬茅屋趁谿斜春入山邨處處花無象太平還有象  
孤煙起處是人家

再次韻答田國博部夫還

蘇軾

枝上稀疏地上稠忍看紅糝落牆頭風流別乘多才思  
歸趁西園秉燭遊

和子山種花

宋文同

風流從事季長家，遶遍官居種盡花。  
應為清才無比敵，擬將文彩競春華。

口號

文同

可笑陵陽太守家，閒無一事只栽花。  
已開漸落并纔發，長作亭中五色霞。

初秋行圃

宋楊萬里

小小園亭亦自佳，晚雲雨過却成霞。  
爛開梔子渾如雪。

已熟來禽尚帶花

晚春

宋 戴復古

池塘渴雨蛙聲少  
庭院無人燕語長  
午枕不成春草夢  
落花風靜煮茶香

觀落花

宋 翁卷

纔看豔蕾破春晴  
又見飛花點點輕  
縱是閒花自開落  
東風畢竟亦無情

宮詞

宋 花藥夫人

春殿千官宴却歸上林鶯舌報花時  
宣徽旋進新裁曲  
學士爭吟應詔詩

山居

金  
元好問

詩腸搜苦怯茶甌信手拈書却枕頭  
簷溜滴殘山院靜  
碧花紅穗媚涼秋

曉發富陽縣

元  
方回

長山礮石片帆斜  
小雨初晴日眩沙  
回首遙看富陽縣  
青煙低罩一叢花

經歷司暮春即事

元 薩都拉

霞飛海燕拂簾過  
風捲魚鱗剪綠波  
閒倚石闌數春事  
滿池紅雨落花多

上陳達卿架閣

元 袁士元

金猊香透小窗紗  
蓮幕歸來日未斜  
掩却竹扉清晝靜  
呼童汲水更澆花

元宮詞

明 朱有燾

春日融和上翠臺  
芳池九曲似流杯  
合香殿外花如錦



不是看花不敢來

絕句

明董紀

小徑斜穿入竹林  
曲欄通轉亞花陰  
牆隈勢逼風如旋  
落地殘紅幾許深

客舍暮春

明徐淮

蜂兒釀蜜心方醉  
燕子營巢語未安  
閉戶不知春事老  
滿簾風雨落花寒

花答

明李禎

多謝天公著意裁，不教妝點豔亭臺。  
無人剪折無人賞，豈贏得年年自在開。

題畫雜花

明錢穀

淡白輕黃各鬪奇，嫩紅殷紫總芳菲。  
上林春色原無賴，不斷生香惹客衣。

殘花

明丘雲霄


昨日看花花滿枝，今朝爛熳點青池。  
無情莫抱東風恨，作意開時是謝時。

古寺尋花

明  
朝鮮女子

春深古寺燕飛飛  
深院重門客到稀  
我正尋花花盡落  
尋花還為惜花歸

御定佩文齋詠物詩選卷二百七十六



總校官庶吉士 臣侍 朝  
 校對官修撰 臣張書勳  
 謄錄監生 臣王應璧

財團法人  
 佛陀教育基金會  
 釋淨空  
 敬贈

